

光緒山西通志

文學錄下

錄八之三

山西通志卷百五十六

賜進士出身頭品戴兵部侍郎兼都察院右副都御史巡撫山西提督軍務張爾恭
旨監修

國朝

李中馥字鳳石太原人前明甲子鄉薦性剛鯁負氣節足迹未嘗入公府遇歲饑典衣振貸巡按某欲薦之辭不赴闕賊陷太原遣人授以偽官閉門堅臥拒之其後姜逆之亂盡守禦方略縣令邵煥元恃以無恐雅嗜讀書晚年益勤朝夕不釋卷掄揚後學不去口著從好集石鼓考本草目錄銀杏園文集藏於家

戴廷斌字楓仲祁縣人明戶部員外郎運昌子也幼負異質讀書十行並下爲文操筆立就應童子試爲袁臨侯學使所

山西通志卷一百五十一 文獻志一
賞謂當以氣節文章名世補諸生食餼甲申後無意仕進居
丹楓閣著書操選政餼版數十種行世一時名滿天下學者
仰之如山斗海內名流南方多聚於水繪園北方則丹楓閣
稱極盛焉康熙己未應博學鴻詞科聲聞甚隆一時名卿鉅
公傾心尊禮王阮亭題其廬曰山右龍門晚以歲貢司訓聞
喜並署曲沃教諭講明正學士風政觀年七十四卒張文和
公爲志其墓有半可集行世

趙瑾字懿侯陽曲人順治丁亥進士官長洲知縣工詩嘗刊
山石詩自薛文清公迄順治庚子名晉詩選後洪洞范彪西
三晉詩選實祖之

傅眉字壽髦陽曲人徵君山之子也五歲失母祖母貞髦君
撫養之七歲能爲小詩十五通經史能文章遭亂侍徵君東

西馳逐十年無家時或樵山中置書擔上休擔則取書讀之
中州有吏部郎者故名士訪徵君抵暮徵君令肩伴之寢與
論中州文獻滔滔不置吏部或不能盡答也詰朝謝徵君曰
吾甚慚於郎君歲甲午徵君以蜚語縲太原獄中肩羈陽曲
倉一夕夢鐵藕花開一枝事尋解嘗僑居汾州客有知其才
者令續鸚鵡賦援筆立草四百餘言奇氣橫溢文未竟客曰
止止擲筆而罷亦不收拾終篇也戴楓仲稱其學類縱橫家
自擬措諸作用時運不偶遂轉地道賣生藥與父厯遊燕趙
秦豫間手輓小車載行李以爲常嘗佔於維陽作佔客樂四
言樂府一日徵君論及某饑寒眉曰此輩並非饑寒累了我
正是我累了饑寒徵君曰此語大可讀書法真行草直追魏
晉漢隸尤所獨步徵君自謂不及也兼工繪事精璽法讀釋

典如舊識詩自宋以下不讀也著有我詩集不摹古不襲時
膽識超乎衆慮體法創取未有故曰我詩楓仲嘗梓徵君及
白居易胡季子詩而以其集附焉題曰晉四人詩謂四人者
心同學同膽識同時命同也年五十六先徵君卒子蓮蘇赤
驥皆以才名

侯璋字樸菴陽曲人康熙丁未進士官內閣中書少穎悟喜
經濟學熟肄禮樂兵農錢穀鹽鐵諸務及鄉會試改試策論
指陳利害殊悉在鳳池揮毫染翰望益著戊午典湖廣鄉試
殫神簡閱夜漏數十下不少倦放榜日卒人謂克勤其官
胡衍虞字恪臣太谷人以選拔貢太學工古文辭性至孝母
病徒步詣傅徵君山求醫藥徵君閱所著以才八目之龐世
道者歲貢亦善徵君文學與衍虞齊名

張志遠字鵬期陽曲諸生品行端潔博學工文善詩詞旁通醫學楷書得黃庭遺法督學高龍光亟稱之晚年益勤於學聚羣書手自評雋著詩詞稿三卷詩叶正韻一卷切音要訣一卷醫學鈔要八卷

王系字世甫榆次人父介石博學能文傅徵君山嘗贈詩與定交官廣昌教諭遷桐柏令未任卒系生有異稟襁褓能識星象十四學爲詩下筆驚其長老高文夏公視晉學奇賞之以選拔貢太學充教習旋舉雍正丙午鄉試明年成進士授樂昌令改大同教授尋告歸家居授徒以終系少負才頗立氣岸所如多不合乾隆丙辰舉博學鴻詞庚午舉經學大吏皆嘗列名卒無所遇著有左傳說桃蟲集南華從好楚詞章句從子品識已酉副貢亦有文名

任琚字佩中太谷人乾隆甲戌進士選香河知縣有惠政琚少客於浙從杭堇浦遊故學有根柢罷官教授於家遠近多來問業端方自矢跬步弗踰

申兆定字繩齋陽曲人乾隆庚辰舉於鄉幼隨父宦遊流寓南服善詩歌工八分篆猶能刻畫金石馳騁名場號鐵蟾子文采風流傾動一時嘗宰朝邑搜求秦漢瓦當有未備者假諸友用古塼仿刻其字毫髮逼真收藏至四十餘種官衡陽時與吳山趙魯菴江都李雨村及同縣折齋山諸人結冷香亭社郵筒往來唱酬極一時之盛中年忽慕神仙得迷罔之疾以終著有涵真閣漢碑文字跋秦漢瓦當圖說詩集孟毓勳字雲龍太谷人乾隆癸巳進士令高縣以廉幹稱棄官歸攜妻入山中衲衣蔬食篋笠櫻鞵自號石逸山人生平

於學無所不窺古文詩卓然成家善飛白行草所著有彝訓
堂文集永慕軒詩草

胡豹變字蔚文榆次人乾隆丁酉舉於鄉沈潛古籍工文章
善書畫年八十餘無疾而卒少嘗從太谷任琚遊琚杭編修
世駿之門人也故學有淵源云著有柳渠詩文集行世

閻偉字昂夫榆次人由武生授例官南平知縣海盜肆擾治
兵督勦擒其渠魁商民頌之公暇喜爲詩歌天才伉爽著有
蘆灣逸人小草縣有黃生者以疑間停聘妻不娶搆訟累年
偉廉得女寃斷令歸生夫婦感泣邑士大夫多吟詠其事值
偉介壽日獻之卽援筆和其什其後縣人並勒之石曰無忘
此老風流善政也

閻恒齡交城諸生居平寡言笑品詣卓絕讀書曉大義工文

詞中年謝絕舉業精六書音韻之學所著有經史正音切韻
指南增訂直指玉鑰匙門法歷代字學說辨字撮要等書藏
於家論者稱其別有會心可爲先儒輔翼

王在廷祁縣人嘉慶戊辰舉於鄉嗜學工詩五古及近體並
推作者性强記家貧難於得書日遊坊肆就書買翻閱過目
卽通大義一時號爲博雅後嗣不振所著詩文皆散佚

郝揆字敘亭榆次人故儒家子幼感末疾取家藏書徧讀之
數年始能履則經史悉通矣卒以寒廢試有司輒遭擯乃縱
橫儒先書心解而力行之與陽曲張翰林廷鑑以理學相勸
晚年家甚貧志節益堅云

以上太原府

衛民牧字若澤曲沃人前明庚午舉於鄉司訓陽曲聘充陝
西丙子鄉試考官擢環縣知縣遷西安府同知闕變棄官歸

國朝屢徵不起與從弟高徜徉山水間吟詠自娛著有勸學
淺說洗目編藏於家

王昌祐字猷升洪洞諸生幼穎異十歲六經皆成誦爲文有
奇氣督學袁臨侯亟賞之家藏書甚富得資披覽奮志於學
再舉不得志甲申後遂絕進取未幾卒著有忘齋支言

王禾命字九如臨汾人舉順治戊子鄉試知遷安縣以廉勤
稱內推行人引疾歸生有至性親喪哀毀盡禮直指劉特疏
旌之從鄉先生桑暉升遊學有根柢文行卓然爲一時冠著
蓼莪操有懷堂筆松韻堂筆邊工漫記行於世

李方蔡字仙葉曲沃人丁酉舉於鄉歷陽曲教諭太原府教
授遷宣平知縣幼讀書淹貫古今爲學博時以社稷之祭與
山川風雲雷雨同壇非王制詳請改正嘗與纂修山西通志

前後九年勞最著至是復輯縣志條分縷析紀載爲獨詳比
遷宣平或以地僻遠勸弗往方秦曰擇官而仕如臣誼何卒
於官貧不能治喪後數十年其弟方芄始以其柩婦

韓魏字醉白臨汾人從父客揚州明季父殉難魏零丁孤若
銳意古學詩筆英邁爲一時同人所推著有獨存堂稿日剛
集湖上吟鄧學威選入詩觀稱其天性淵篤有合風騷之旨
賈鳴璽字荆生曲沃人父佩徵見儒行鳴璽性穎敏傳其父
學康熙癸卯舉鄉試第一丁未成進士授內閣中書初第時
有要人欲羅致門下不應在中書富豪某願奉千金佐輸粟
亦不答士大夫高之晚年假臥山村不輕履城市嘗修縣志
平陽府志著有存悔堂詩古文集

張枚字小公太平人康熙乙卯舉於鄉卒咸陽有惠政告歸

與王侍御奐會臧太史爾心結社唱和著有汾山偶掇卜公遺稿

王世家字二正翼城人舉康熙甲午鄉試性淡泊潛心經史藉甚士林五十餘年未嘗輕至縣庭著有翼志存略易義彙解藏其家

范爾梅字雪莽幼穎異甫四歲授以書卽能成誦人目爲神童十一歲遭父喪擗踊如成人負母紡績課之讀其學遠宗程朱近取敬軒踐履篤實一以誠敬爲本雅善琴發明樂律多先儒所未及晚年尤篤嗜易理反覆研究至忘寢食易筮之前猶執卷不釋所著有書札說五經隨筆周易輪圖樂律考周禮補解行世同里任重任字莘叟范一偉字个臣並諸生與爾梅俱受學於范彪西稱高足彪西所刊垂棘編理學

備考諸書三人皆與校訂云

賈華平字春圃曲沃人內行肫摯工古文詞沈靜寡言與人交呐呐如不出口及論古今人物典故則滔滔不絕與修山西通志年六十以歲貢終

廬秉純字性香博學能文以詠虞美人花著名一時有才子之稱由翰林歷侍御風骨稜稜譴正不阿解組歸授生徒於汾沁澤潞間門下士登甲第者以百數著有龍泉堂稿並詩集

秦武域字于鎬曲沃人由舉人官兩當知縣土瘠民貧到官力課農桑教之紡績民漸以蘇縣無志始爲創稿焉歷安縣及枝江俱有聲致仕歸與修嘉慶曲沃志選山石詩名晉風雅自著有紫峯集

鄭第業字蓮溪太平人乾隆甲戌進士選溧水令有循聲性
篤摯事親孝好讀易神思湛然以病失明十年後光炯如初
人異之李時中其同年也官甯武教授好學深思老年弗倦
河間紀文達公嘗爲之傳

賈存仁字木齋浮山副貢事親至孝鄉居以禮範俗精於小
學著有正字略等韻精要及弟子規諸書祀孝弟祠

賈澤洛字書原臨汾人少從父宦遊父卒後家無儋石鬻已
產代兄償逋至於賃屋而居而志節皎然怡情風雅蕭然自
得縣令洪午塘聞其名造廬躬訪與結詩社提唱後進一時
學者翕然宗之著有雲溪詩草

王楷蘇字眉山洪洞人幼穎敏日讀書積寸許詩文吐屬迴
超恒徑乾隆癸未舉於鄉性至孝侍母疾溫藥進膳數年如

一日父以事答灤口病聞之星夜馳往溽暑炎蒸遂致耳聾
謁選授知縣辭歸邑令闕重其品學延主玉峯書院以古學
激勵後進從遊者日眾善處鄉黨請張者未嘗與校遇有聲
爭得其一言立解平生無書不讀詩文宗漢魏健談善飲每
酒酣剖析經義微言奧旨一字無誤所著有悟堂學吟騷壇
入略行世史記摘訛藏於家

王楷歐字再修洪洞人生而穎異讀書輒解大義願性通脫
不事章句日以超距角力爲戲父惡之衣以赭扁複室中室
多藏書無聊時則取閱之因有悟遂發憤力學既補諸生累
舉不得志乃浪迹燕趙齊魯間徧交其豪俊高歌痛飲凡平
生抑鬱之氣離合之感哀樂之情遊覽之勝盡洩之詩悲壯
蒼涼挾幽燕豪俠氣嘉慶丁巳舉孝廉方正以校官注選年

六十五卒於陽城學署所著有四筆山人詩鈔甲子合易圖
四筆生雜著海棠書屋吟草蕙田詩話

王楷維字張甫楷蘇從弟也才敏學博工古文辭所著有四
齋問見筆記及詩文集以恩貢終

范鶴年字青子洪洞人官衡陽知縣多惠政性穎敏嗜學工
詩古文辭與黃太史洽徐進士昆少共筆硯相切磋而獨善
爲詩登第時闈卷排律特爲

高宗褒獎在官案牘之暇不廢吟詠著有寸芹草貌雪山房集
墨漲雜俎青影樓詩餘

鄭堦字聲伯洪洞諸生博覽嗜古抱才不遇徧遊齊魯秦蜀
身之所歷多發於詩晚年研求經學著有周易家解四書循
注及霍麓詩草同時以詩專門者有諸生段采字翊宸著梅

莊詩稿李鍾崑字玉峯嘗客山東值東人開化香閣選

國朝詩錄鍾崑古近體至百餘首于維謙字牧齋亦有集又
諸生韓練字春塘嘗客齊著灤上竹枝詩百首岳直字琴堂
亦僑居灤口與同里王學博楷歐濟南陽用晦等結吟社東
土盛稱之有歷下五子之目

張道渥字水屋浮山人工詩善書畫時稱三絕山水法大癡
能得其意間作人物竹石雜卉亦生動有別趣性狂直喜交
遊其詩嘗爲袁簡齋大史所賞采入隨園詩話初以鹽務官
需次兩淮在維陽與吳穀人羅兩峯諸人交最契及官蜀復
爲制府孫補山所器後爲蔚州知州以老去官歸日事吟詠
蒔花種竹以詩酒樂餘年所著有水屋賸稿二卷行世

褚齊亮字唐輔曲沃人乾隆己亥舉於鄉司訓稷山成就甚

衆嘗入關著西遊草在襪有高涼草鳴秋詩草

王起岐字雲溪鄉甯人性高簡絕俗子然一身棲處邑之呂
仙祠歷三十年晨夕吟詠意興灑然年七十以恩貢終著有
尋芳堂集

李印洛字程源太平諸生讀書信古規規前修著有周官備
考儀禮彙解

崔岳字芳洲曲沃人性曠達讀書好古爲文豪邁有奇氣善
事繼母與羣從相友愛貧而好義視人世榮利泊如也著有
悠然錄東籬雅集詩草

張翼神字鵬九曲沃諸生性聰穎博極羣書善賦詩嘗遊中
州覽諸名勝與閩古陵孟蘭州兩太史題詠唱和最多著有
雪園心詠集子如熊工書

劉師陸字子欽洪洞人嘉慶庚辰進士入翰林改清遠知縣
累遷至湖北荆宜施道在官以廉正著稱生平博雅好古月
俸所入盡以購書以及鐘鼎彝器所藏金石文字至七千餘
種客中州主講大梁書院文采風流與翁覃谿王蘭泉相衡
子輅字公路同治壬戌進士官海豐知縣戊辰四月捻逆東
甌城守積勞卒贈卹如例

張鳳翔字丹崖太平人嘉慶戊辰魁於鄉司訓陽曲登進士
以知縣用辭歸仍任原官著書窮理沖澹之思時形吟詠時
論高之工書行草具鍾王法高日午字麗端由丙子舉人歷
官太原府教授研精經義著有記事提要偶悟隨筆楊國琦
亦宿儒也以歲貢署太原府訓導著有廉識集實驗錄閑情

稿諸書

賈長泰字階平臨汾人嘉慶庚午舉於鄉事母以孝稱淹貫經史著有韻辨慎歧及詩文集

王之藩字价人臨汾人由廩貢官介休訓導性敦篤多聞識工琴善畫著述甚富存者有蘭泉吟稿絳山筆記寫真譜略半耕錄養正編四禮幹諸書

李人蓮臨汾諸生品端學粹自經史百家無不博覽有嘯古堂詩集姑射雜志恆齋雜纂嘉道以來以詩鳴者周來謙字沂堂布衣嘗客於楚著有楚聲一卷宋衡字聲園晟貢有留餘堂草王布文字蕉川亦貢生安貧樂道工琴善畫有雪堂詩草席芝蘭諸生詩宗晚唐有集雜克敏字森泉拔貢有友竹山房剩草徐煥字堯文亦選貢有漱石山房稿張方臬字岱觀副貢多才善病遊燕趙時以詩囊藥籠自隨自署病張

郎有韞匱燕游諸草樓山唱和集

劉肇淮字季海洪洞人道光乙酉舉於鄉選授遼州訓導學問淵博品行高潔工詩古近體俱臻絕妙多散失從子長年搜存若干首爲虹橋詩錄

張子特字伯喬曲沃人道光戊子副貢少苦心孤學無所師承每以大儒自許以童試受知於周石芳學使目爲國器家纂負讀書無餒志亦無愠懷性強記說經多創解通古韻習歷算於諸史研究志表爲文法尙書春秋傳史記詩本三百篇漢魏及晉陶潛制舉文似嘉隆諸子撰述甚富有七經拾遺文集詩集雜著若干卷最嚴取子嘗稷食三年黍食五年困苦終身夷然不以累志年七十卒

關作槐字面三太平人舉道光辛卯鄉試性高邁學識淹博

周石芳侍郎賀耦庚督部先後視學皆奇賞之從賀遊最久
輟車所歷遇名勝輒與題詠晚獲一第授經晉絳間以終著
述多散佚存詩鈔二卷同時張鴻舉字雁峯壬午領解以經
學稱官岢嵐州學正

商昌字仰之洪洞人道光庚子進士選廣西知縣遇亂以憂
勞得心疾卒昌天姿英俊爲文多奇氣登第時年甫冠遂究
古學與王顧齋邢秋丞及趙城張鐵生交益務博覽間爲詩
亦多風趣著有石生存草

尉光霞字伯綺洪洞人道光辛丑進士以知縣分發湖南遭
母憂尋卒爲人修眉長爪癯若病鶴而才學宏肆工詞賦及
古近體詩脫稿輒爲人傳鈔名諫一時並工畫蘭秀韻天成
著有餐霞詩草

王椅字雪堂洪洞諸生幼聰慧讀書過目不忘博覽典籍爲
文敏捷頃刻千言詩特精華圓妙自成一家健談辨論風生
聲若洪鐘嘗驚其坐上客才名大譟士林中莫不知其名者
年四十遽卒著有絳雪堂文集詩集雪堂詩話雜俎

邢萬秀字秋丞洪洞人舉道光癸卯鄉試幼學嗜古志行觥
觥工文章尤喜吟詠與王顧齋李勉亭相唱和嘗曰生平有
詩百篇能傳足矣奚以多爲鄉薦後遂絕意聲律一意窮經
務爲樸學篤於師友嘗受學於孔明經穎士孔沒後樹石表
墓又搜輯王雪堂詩文手鈔成集未幾卒時論惜之所著經
說多散佚惟秋丞詩草存勉亭名敏諸生詩名與尉進士光
霞埒兼工畫蘭自號蘭坡性揮霍好客中年多故抑鬱不自
得家當九箕山之陰時攜酒登臨吟詠自娛無何卒著有箕

峯唱和集翠游山房逸稿蘭坡吟草

楊約字簡侯浮山諸生工詩善畫性瀟灑喜交游所往還皆知名士文酒之譙流連無虛日不善治生家遂中落卒以貧死著有清夫吟稿張華銑字蓮渠布衣也亦工詩

劉淑原字次村浮山人少孤苦力學補弟子員授徒養母能篆隸喜吟詠著有曉園詩草四卷以歲貢終同時秦綱字青鋒幼奇慧能詩以貢生歷太原府訓導有集二卷張甸青太學生少棄儒業而不廢吟詠著有主月吟

王軒字霞舉洪洞人性敏悟好學深思幼爲詩已能驚其長老旣舉於鄉則益治樸學研究三禮爾雅說文以及地輿歷算各齊魯三年學益進錢唐符葆森選其詩入正雅集資以金勸由貲郎進遂援例官兵部主事在都與一時名宿結社

唱和以文章氣節相砥礪每高麗使臣至皆投詩造謁有執弟子禮者祁文端公方在告見所著歎曰吾鄉後起有人石州死道不孤矣其後文端再出以經學特疏薦焉同治壬戌成進士引見以知縣用仍改歸部曹與兄昂素友愛兄卒乞假歸葬自此無復仕宦志主講宏運書院歷十年值光緒大禋胡邑相奏請襄辦賑務事竣復與撫部會忠襄公議修通志延爲總纂兼主晉陽講席會當事者擇高才生別設令德書院復移席焉居會城凡八年卒生平湛深經術於六書九數用力尤勤詩文奇崛自成一家篤於師友脩脯所入率以資親故愛才下士後進多樂就之纂修通志體例多所手定河東道府州沿革亦其筆也卒後諸生祀之三立閣及四徵君祠所著有壽經廬詩集初稿續稿行世算學三書釋經廬

文集雜著藏於家

賈從正字季繩曲沃諸生貧而好學博覽羣書嗜詩古文詞於學術源流一一辨別有從而問業者因才而授不爲時風衆好所囿一生不謁貴人晚年工隸法尤精於醫求診者無貧富一視之

董文明字後江曲沃諸生少客於豫從蔣子藩太史遊博覽古籍工詩古文尺牘兼精書畫分隸竹蘭尤胎息深厚卓然名家爲人風骨端凝志節皎然家素裕盡以腴產讓兄挾筆墨遊四方所獲資盡以購書嘗再應省試聞主司爲執友某已辦裝矣託疾不赴又某中丞者與有世誼聞前以手札至許爲道地立焚之竟不與試而歸同治中館鄉愔令某所值丁卯寇變令將攜家遁阻之不可憤而自經體素偉纒絕墜

地再繫再絕卒遇救得不死先是咸豐癸丑髮逆陷曲沃妻
尹氏罵賊死痛之遂不復娶有勸以納妾者亦拒之竟無子
著有草莽輔志書石經殘字考及詩文集

衛天鵬字莊游曲沃人父暈諸生工詩賦天鵬少聰穎書過
目輒了了爲詩文下筆有奇氣從鄉先生張伯喬受經學年
二十安邱王棻友攝令曲沃從問六書義學益進舉咸豐戊
午鄉試歷主鄉宦翼城霍州書院自負才略慨然思有濟於
世旣無所遇乃壹意著述其說經多新意間爲詩歌及隸草
篆刻皆有逸趣鮑華潭撫部見其書奇之欲選刊未果及會
忠襄公撫晉遇以國士延募山右金石志當賑務方始每虛
懷咨訪軍門嚴扃夜半啟鑰出入爲常也而性傲兀不羈喜
以氣陵人卒坐此觸衆忌羣目爲狂選授五臺教諭鬱鬱不

得志踰二年以疾卒著有四書說易圖學周易釋例周易中
爻表爻象說卦八卦消長左易占學易稿今文尙書五續禹
貢雖末說詩錄孔孟詩說詩韻提要春秋歷譜左氏辨証孝
經章句爾雅考正九經遺義彙室經譯談經瑣記讀經句讀
最目三雅最目古音表性理通稽古歷元地理考彙室日記
及詩文集

董文燦字芸龕洪洞人咸豐辛酉舉於鄉官內官中書博雅
好古工詩及小篆所藏金石文字甚富著有山右碑目貨幣

所藏錄芸龕詩集

以上平陽府

王恭先字孝伯臨晉人舉順治辛卯鄉試第一己亥成進士
授河間府推官缺裁補崇明知縣有惠政以事鐫級遂歸少
讀書柏梯山苦志力學通籍後歷關陝涉江淮徧交當世名

流所得俸盡以購書歸里後日夜編摩以著述爲娛慕高達夫五十學詩輯詩文曰慕適軒集晚年喜摹劍南裏所作曰老學菴集纂修臨晉縣志簡該有法一時推之

謝陳常字文洽臨晉人乙丑進士入翰林授編修典丙子廣東鄉試告歸卒於家陳常善文章工書法鄉舉時出趙秋谷門下獎許甚至在翰林與仇兆鼂孫襄俞長城諸人稱同年以文學相切磨並爲當世所推談藝者奉爲指南尤篤內行執親喪矯陋俗循古禮爲大雅樂道不置云

郭凝然字石潛滎河諸生博綜經籍詩文皆成一家言著中庸行義河洛經世地理中庸諸書及柏崖稿

王桂字子山臨晉人生而穎異沈靜寡言讀書以筆代口不事吟詠年十七往省父於南陽鄧州彭海客見而奇之延館

其家訓子姪彭氏藏書甲中州桂肆力搜討歷三寒暑讀且盡遂爲通儒居鄧六年歸里屢試不遇遂絕意進取以著述自娛年五十卜居東亭谷之塔兒原栽竹樹松教授生徒人稱爲他山先生與遊者運城宋太史雅伯解州王廣文繩先平陸柴文學象天猗氏王太學錫采皆一時名士著書數十卷卒其葬書十六篇盛稱於世曾文正公嘗序之

邵化南字臨棠虞鄉人嘉慶庚申魁於鄉學以窮經汲古爲先披閱有得卽爲詮注於易尤精性嚴毅一介不苟孝友尤足爲人表率著有周易詮釋世範雜說針灸發明芾圍雜稿藏於家李元瀛字海初亦精於易著有陰符經注釋柏心堂詩文集以選貢充教習卒

吉懷字坦如永濟諸生性仁厚工書能文尤深於詩著有借

園詩集吉萬邦其族也亦諸生嗜學有若菴客窗日閒

姚飛鵬字圖南永濟人博學工詩有愛敬堂集所居爲唐孝子姚棲雲故里日以敦倫行義導迪宗族年九十以歲貢終荆兆丹猗氏舉人事親孝居喪竭誠盡禮博覽典籍嗜古成癖口不言世俗鄙事以知縣分發河南未補官卒

賈煥章字仲昭永濟人少穎悟讀書過目成誦篤學至老弗衰著有周易附錄禮記集注左氏兵法論要及首陽山人集同時崔坊字表臣性嚴謹事母孝工詩著有梨花館遺草

蒲州府

李甲黃字九影黎城人順治初以舉人官安邑教諭遷安平知縣入爲工部主事卒甲黃幼有志聖賢初仕安邑書曹月川蒲霍教條以訓學者蒞安平著勸學歌揭之通衢諸生有

廩於墓者月造其阡給以廩餼在部亦能舉其職著靜觀齋
語錄磊園文集藏於家弟元黃字行漳諸生亦有學行

程正續長治人舉順治戊子鄉試第一官定南知縣廉敏寬
平治行甚著嘗與修郡志自著有程氏乘餘錄及蓮塘詩文
集

程之昭字二漳正續子博學好古文辭詩賦精雅藝林推之
著續乘餘錄程氏人物考醫海勺波金剛經集解潞安詩選
舌耕堂詩文集若干卷其潞志拾遺一書考厥典要鑑古者
尤精賞焉以歲貢終

孫奇字象陽屯留人由恩貢官甯海知縣少孤淬礪於學在
官有政聲尋告歸鍵戶讀書嘗著父子夫婦昆弟朋友四箴
訓其子弟晉人傳誦以爲名言邑令屠纂縣志邀奇參訂閱

三年乃克成書

趙良玉字爾栗長治人少與兄通判良璧齊名詞壇以歲貢官襄陵教諭遷大同教授值歲饑與有司設法分賑實惠及民擢太平知縣值兄卒援漢人期喪去官義遂不赴歸築序樂園課子弟著述以終

王子莊本名端以字行黎城人家貧力學年十七以副榜貢尋舉鄉試登雍正癸丑進士授靖安知縣廉勤有實政歲饑設法平糶陳文恭公安謀時撫江西特善之在官如儒素於稅課羨金吏民例饋悉以辦公無所取嘗語弟嚴云官之貪如女之淫豈可復爲人吾有所懼而不敢爲耳母憂歸授徒里中研究經學歷二十餘年卒所著有論語筆說書說求是春秋說求是集古留眼若干卷

高獻字抒廷黎城人工詩古文以拔貢應乾隆丙辰博學宏詞科報罷歸踰十年始舉於鄉性嚴介初入都才名藉甚輦下貴人有羅致者恥以竿牘希進泊然自守雖不遇不悔也丁卯晉闈主試者爲諸宮詹錦鴻詞翰林也奇其文旣知爲獻大喜所以慰藉者甚厚而獻篤於友愛遭同產弟喪竟不復與會試家居敦倫行義著述不自收拾散佚無存同時申如岳字嵩生以歲貢官崞縣教諭嘗撰上黨形勢賦銅鞮宮懷古詩文名諫一時年八十五卒

靳榮藩字价人黎城人乾隆戊辰進士授上蔡知縣再補遷安擢蔚州知州終於大名府知府性敏慧好讀書博覽強記爲文雅飭有法尤深於詩在官能以儒術飾吏治所至興學勸農務以德化遇先賢故蹟表其宅墓士女有奇節至行皆

爲文或詩歌以激勵之最喜吳梅村集爲之箋注竭十年之力始成曰吳詩集覽於明季逸事搜採尤備盛行於世所自著有綠溪語綠溪詩文集

張天龍字花舫長治人歲貢少負才名丰采穎異嗜吟詠復潛心理學於世味淡如也著有花舫集常煜選潞詩所收最富

廉可旌字闕通長治人歲貢少負才名博極經史工詩善書賦試不遇遂南遊於吳越名山勝境足迹幾遍晚年所學益進著有耕寸堂集南遊草石刻啟蒙十鑑山右詩存採錄甚多

郭時正潞城人少補諸生學問贍博尤長於春秋至老手不釋卷著有四書折衷五經韻學及姓氏譜三卷以歲貢終

李鍾奇字秀峯道光甲辰舉人官襄陵教諭年七十卒於官性孝友家貧力學尤工韻語從其遊者多有聲藝苑及卒貧不能歸襯襄陵士爭贖之更勒石以誌教澤子晉初拔貢楊向榮字欣齋長治人好學讀書至忘腹食客至亦漫不省既補弟子員志益銳日講求實用於時俗利祿之學蔑如也嘗手繪地圖著有天皇台參與地紀略祭器說祭器解各一

卷

趙斗南字壽垣長子人性敏慧幼學不倦工詩善書學使汪深賞之以選拔貢太學贈詩有樹斗臺南第二人之句蓋以鄉先達宋氏期之也著有浣花軒八詠四不如齋詩

牛俊字子傑壺關人幼好學家貧無書從邑中藏書者徧借讀之其所著述皆於古人有悟入處一時與交者皆砥行殖

學之士其自吟有云暮還片時興詩吟一世窮襟懷境遇概

可知矣所著有且菴詩古文集十餘卷以歲貢終以上諸安府

朱之俊字滄起汾陽人前明壬戌進士選庶常歷國子司業

翰林侍講坐事罷順治初起祕書院侍講典乙酉順天鄉試

以終養歸之俊少穎悟讀書先經後史淳匯演藻復肆覽名

山鉅川借海內書宿遊故詩古文辭克成一家言著硯廬全

集五經纂注琅嬛選奇諧書藝苑重之

胡庭字季子汾陽諸生工詩與陽曲傅青主祁縣戴楓仲友

善楓仲稱其泉石間獨往獨來自成孤韻發諸詩者如怨如

慕有花淚鳥驚之意著有畸人集

張國珍介休人以貢官太原訓導潛心經學刻精造微著易

經評解四柏齋文集子正任乾隆丙子舉人究心三禮嘗與

方望溪論喪服祭法望溪嘆爲得漢儒精義著有勉應錄警
躬草及史議諸書

梁鍾豫介休人父才傑由進士官福清令有政聲鍾豫少負
才名豪宕不羈由己亥進士官常泰令洞悉民隱釐剔無遺
年未四十卒著有燕臺集自以少作不出示人遂無傳
卞文蔚字豹章汾陽人以貢官興縣訓導性端慎訓士以植
品讀書爲兢兢孫文定未遇時受業其門執弟子禮甚恭工
書法行楷皆浸浸入古

呂文樞字用晦以舉人官國子監助教著有春秋正宗及正
氣錄素與縣人呂肯堂善在太學以事牽連逮獄對簿時問
者曰此有呂肯堂造言耳意欲藉以脫文樞文樞直應曰忌
者欲擠我何可復旁及嫁禍於正人哉問者默然爲心折事

卒得白肯堂字子建能詩性鯁介以優行貢成均數年無所
合而歸家居講學以終

梁錫珩字楚白介休人議敘郎中博學工詩嘗注李義山詩
其所自著有非水舟集願俠君亟稱之

劉五教字敦寬臨縣人性穎敏工詩賦以諸生舉丙辰博學
宏詞科報罷歸客介休與縣上四山人以詩唱和癸酉以選
拔貢太學有蓮峯集

郝康字康侯平遙人乾隆己卯鄉薦性沈懋溫厚與人交無
疾言遽色篤志力學經史子集手鈔成帙著有敬業堂尙書
啟蒙

劉錫五字澄齋介休人乾隆辛丑進士授檢討以詩名公卿
間與法時帆吳穀人張船山王鐵夫結吟社典己酉雲南試

出守德安大吏重其才按獄湖湘李萃玉聚衆案延岩十年
不決錫五至研鞠一晝夜遂定讞調武昌知府卒所著有隨
淚書屋集

董柴字也愚介休人官宿州知州歲饑振貸境無流亡民各
輸一錢建亭於睢溪以表其德再補涿州不赴拏舟南遊遍
訪名勝所至詩酒流連傾倒一時歸築隨分園居之與任大
庾梁濟王佐皆以詩名號絲上四山人其詩沈鬱排奐有北
征符離諸集帷罔文集半壁山房稿大庾字西郊學行純粹
工五言著有愛餘書屋詩文明史倚聲集濟字田夫遊歷半
天下著言志山房集劍虹齋詩鈔詩餘詩話若干卷佑字秋
谷工古文乾隆中與修縣志精於醫著擬古草堂集

魏國卿字錫命汾陽人博學工詩好遊覽所至必有記遊之

作沈尙書德潛王光祿鳴盛皆賞異之以吏目分發江南歷
署松江經歷華亭無錫縣丞所至有惠聲乾隆戊子調金匱
望亭司巡檢時奸人爲幻術截人髮有司偵捕江淮間騷然
國卿所部獨安靜不擾大府以爲能將薦用之浚巡辭歸晚
年一意治詩才名藉甚汾晉間顧純篤多長者行廣仁義園
西軒義學皆所創立也有集曰梅軒詩鈔

茹綸常字容齋介休人天資高朗行義不苟家藏書甚富皆
手自讎校詩筆汪洋自恣而氣骨蒼堅卓然成家嘗和隨園
自壽詩爲海內名士冠簡齋引爲神交嘗有一笑山房集年
踰六十以太學生與丙辰千叟宴拜詩刻如意文綺之

賜其後有布衣仕銳字卓莽亦能詩與綸常結味外社又歲
貢郎成簡著甫園詩稿子鳴玉著閒閒草孫夢元著種石山

房稿三世並以詩名

李曰普字曉園介休人官鎮江通判踰年告歸築別墅於城南集文士觴詠其中四方名流行輅經過輒以詩投贈有鄭莊置驛之風尤精賞鑑藏金石碑版甚富所著有問花軒集南園雜吟子靖從子埈並有文名埈字岑泉研究宋學著東軒集及平旦錄舉孝廉方正不就以諸生終

董杜字也牧介休諸生少孤事母以孝聞苦志力學實事求是而落拓嗜酒不事生產貧困以終有詩集

宋廷魁字其英少負雋才居母喪哀毀幾殆生平不求苟合著有竹溪文鈔詩鈔間亦作畫做大癡於竹尤工

段鹹字安素汾陽諸生性博覽天文地理諸子百家靡弗講貫而尤究心經學一以朱子爲宗家貧不事生產謝舉子業

六經分年立課篤老不倦子山舉乾隆壬子鄉試敦篤內行
淡於榮利有父風聚徒講習終其身

莫兆晉字通甫平遙人少好學博極羣書嘗著南華辨義道
德指南晚年學益進以歲貢司訓芮城日與諸生討論經傳
立課程相與講授娓娓不倦

李季昌字春溪汾陽人道光乙未舉於鄉官長治教諭宏獎
寒酸人樂就之工詩喜爲小詞有詩集

李榮達字春舫汾陽人初名振宗乙未舉人被黜復領癸卯
鄉試以光祿寺署正供職都中爲人倜儻不羈工古文詩詞
於書畫醫理兼擅盛名輦下造詣者趾錯於門所得資輒以
應交逝之貧者旅食時不給夷然弗顧也著有詩集若干卷
白恩佑字蘭岩介休人天資雋異五臺徐松龕撫部嘗館其

家從之受學文譽藉甚登道光丁未進士入翰林尋改工部主事以部郎值樞廷咸豐中轉御史督學湖南聲望巍然生平好陸王之學而博涉典籍踐履端謹不隨俗委蛇摧長寶道未幾解組歸寄情書畫間爲詩歌自娛年七十卒

李士衡平遙人官忻州訓導性嗜學善古文詩詞在忻八年以植品讀書激厲士子成就極多沒後諸生靡不出涕著秀容唱和集二卷寶一草堂古文四卷

曹樹穀字藝五汾陽人少補諸生累舉不得志遂絕魁取肆心考訂凡朝章典禮方州志乘先達言行詩文別集以及金石靡不研覈詩文不拘一格而自嚴整合度汾志出戴東原手推名筆樹穀更爲之補遺正誤一時服其精博同治初舉孝廉方正所著書二十餘種悉藏於家

以上汾州府

畢振姬字亮四高平人讀書五行並下師事山東王漢河南李珍修舉前明壬午鄉試第一順治丙戌成進士授平陽府教授入爲國子監助教遷刑部主事歷員外郎中出爲濟南參議道時歲旱盜王顯張甚煽流民盤踞峒崖設計招撫歸業者七千餘人秦山香稅羨餘官府分利名爲公費至是並籍以充餉厯廣東兵備浙江金衢道尋擢廣西按察使殫力梳爬屢平反大獄捕獲巨盜經略洪承疇奇其才題升湖廣布政使以疾辭性嗜學不修邊幅在京都坐臥一室瓦鐙布被清苦無比同人戲呼爲有官僧及外任往返一僕一馬食無兼味身無更代衣所至率晚夜力學爲常爲文主春秋內外傳而與古堅鬱得之管子與傅徵君山友善徵君常選定其文名爲西北文集戊午舉博學鴻詞以老病辭歸卒年六

十有九著尙書註西河遺教四州文獻山川別誌諸書

白允謙字子益陽城人前明癸未進士翰林院庶吉士

國朝授內翰林祕書院檢討纂修明史丙戌分校會試並典
順天鄉試所得皆知名士遷侍講學士累官至刑部尙書緣
案降調補太常少卿遷通政使疏乞歸生平喜講學敦內行
例得蔭子以予孤姪里居閉戶讀書以歸庸名其齋卒年六
十有九所著有東谷詩文歸庸齋集桑榆集輦下新聞林下
晚聞學言家譜祭約等書

張鎰字緘三沁水人前明癸未進士順治初官國子監助教
遷兵部主事歷郎中以抗直忤上官罷歸博覽嗜古家居吟
詠自娛年九十三卒著有史臆晉南名賢錄越吟遠園筆暇
漫亭詩草

王克生字孟禎陽城人順治丙戌進士雋光知縣性喜書購藏至萬卷雖行遊宴飲必挾一冊自隨人以書癖目之著有懷古集白象頤以丙戌舉於鄉官崇信令引疾歸能文工詩著懷觀堂集

張道湜字子礎沁水人前明尙書五典孫也順治己丑進士授翰林院編修出爲商洛僉事遷天津副使以終養歸道湜喜讀書工文尤擅臨池之譽在史館前輩率折輩行與交及官監司所至克舉其職文章政事蔚爲時稱著史鑑校錄諸書藏於家

牛兆捷字殿洋高平人康熙己未進士少師傅山舉振姬有器識令灌陽教民敦禮讓務農桑栽成士類縣人建祠祀之著有陶史草十卷

牛兆鼎字瀚洋兆捷弟也與兄同師舉振姬博學工文有南
園詩草又輯左傳十國紀事本末敘論評隲莊子文選李義
山詩集繼振姬兆捷主壇坫者三十餘年

陳豫朋字濼村澤州人文貞公次子康熙甲戌進士官翰林
院編修歷任福建鹽驛道八歲能詩文貞爲授杜律詩話居
官清介自守文名重一時有集行世

陳隨貞字孚嘉文貞公從子也天資俊逸學問宏深康熙已
丑入翰林假歸不復仕所作詩古文皆不經人道書學董文
敏得其神髓間署董款久之亦不能自辨也築園山中詩酒
蕭洒以終著立誠堂集寄亭詩草

陳壯履字幼安文貞公子也力承家學以文章著名翰苑歷
官侍講學士著有潛齋詩集從弟咸受字若谷以貢官靈石

教諭天性孝友靜簡嗜學著有福廬詩集

田嘉穀字樹滋陽城人康熙壬辰進士入翰林由檢討擢御史與刑部爭獄不肯署名遂罷歸資敏悟嗜學所鈔撰者動盈尺雍正中嘗輯府志里居十餘年卒

畢潔字萊漪高平人癸巳進士累官正定府同知端雅廉靜友如其人所至有政績既歸淡泊自安著有宦遊集晚年自作拙叟詩人以爲實錄云

樊度中字德涵沁水人父王稷歲貢有學行度中性冲簡詩古文辭極律清嚴以選拔貢太學陳文貞公延館京邸名謙公卿間終定襄教諭有圃餘詩集

王敏敦沁水諸生姿性穎異善古文詞足迹半天下著述甚富其鎿花賦荔枝賦皇居賦澳門記羅浮山記世多傳誦

祁璵字萬懷高平人少以孝友聞選於史學纂通鑑編年錄百餘卷與綱目相出入作詩不名一家有龍石鷄肋等集

趙璠字汝玉高平人勤於學經史子集手鈔定本作詩自適曰安命集李培蔭字菱石事親以孝聞通經學善詩詞古文以貢司訓忻州著有菊圃詩草學圃摹古文集

司曰齡字靜山高平貢生於書無所不讀雍正末當事薦舉鴻博不赴嘗應省試於逆旅見傳徵君佚文欲假以行不可因渴留累日寫得副本竟誤試期夷然也殫心著述至老不倦百紫峯文集法志拾遺補闕並選古文精華十一史精華等書性高潔足迹不入城市二十餘年卒

關遐年字鶴亭鳳臺人由進士授吏部主事洊升禮部郎中己酉會試同考官所取極一時之選阮文達公元那文毅公

彥成皆出其門文達卷奧博讀者驟不能解再薦再擢遐年
乃取文中典故逐一註明主司如嘆服後出爲平樂府知府
張承綸字錫三高平人達於經史百家之學尤工詩與從兄
小渠鳳臺苗雪巖結蒲溪詩社嘗借遊吳門以詩介顧花橋
以謁沈歸愚尙書尙書謂其盛唐格遇南士必稱之家富於
藏書築沈煙樓儲之計二十餘萬卷著有詩述及西軒遺集
苗令琮字季黃鳳臺人乾隆辛卯舉於鄉蚤歲孤寒矢力風
雅與同里范春山學博趙鐵崖布衣登臨酬唱殆無虛日人
目爲狂遂自號狂三著有喪天一瓢山房津門等集沈歸愚
尙書嘗目爲魯連太白一流人物後官甯鄉訓導

范振新字春山鳳臺人才力富瞻學問淵邃以諸生貢太學
親老無意仕進居里門以風雅提唱後進經其指授皆彬彬

可觀嘗有送人句云禾黍秋風路雲山晚照身山陰童二樹
客中州見之曰中唐名句也持其藁去有織襄亭集子開字
耳黃諸生亦工詩

趙溥字化光高平諸生性磊落精於醫暇輒爲詩著三穆堂
醫學集解及詩草今不傳其雁字詩三十首紀曉嵐宗伯甚
賞之贈以詩親題卷首

賈漢輔沁水人歲貢博通經史工詩古文有樛亭詩集同時
張傳价亦能詩博聞強識有秋雨集並說臆說以太學生終
又諸生張殿敘有菊逸集歲貢王丙雅有南鄙農集

王汝楫字松川陵川人以諸生貢太學在都與寶斧塘太學
王楓船侍御相頡頏家居櫛木山莊詩酒唱和座客常滿自
號西溪老人著有西溪詩集

和友邦字曉園陵川人潛心力學詩文清微古淡近王孟章
柳諸家家貧往往斷炊吟詠自如以歲貢選蒲縣訓導終於
官

武維藩字价堂陵川人以拔貢歷孟縣及夏縣教諭告歸卜
築別墅號小南莊工詩善書四方求書者戶外屢滿著有四
聲韻詳註

秦懋效字松嵐陵川人乾隆丁酉拔貢官深州州判工詩五
言淡遠有王孟風格著有燕南趙北詩草與王琚傅弼楊瀨
諸人稱爲陵川六詩人琚字崑圃弼字築嵐瀨字雲亭並貢
生而弼尤精於醫有滋雨山房集

延君壽字荔浦陽城人官萊陽知縣多惠政尤善決獄緣事
罷民伏闕請復格於例不行越二年事白補長興縣艱歸再

補五河卒性篤實好學詩古文字畫皆卓然名家初筮仕多以黃郎輕之及觀其政事文章無不敬服敦於友誼與姜黻生張雋三詩酒唱和並刻其集晉六硯草堂詩文集行世子三賞拔貢有詩名常歲貢策字少池道光乙未舉人官解州學正好學於書無所不讀尤深於詩所著有春秋補義論孟史通易註四書廣義芻蕘碎語少池詩集文集

張晉字雋三陽城人篤學能詩稟諸生游學閩越燕齊間得江山助詩益工歸與延君濤諸人倡和無虛日其弟子李毅以詩受知於周石芳學使詢其師以晉對因聘入幕每成一篇輒擊節欣賞嘆曰若雋三詩豈獨雄視三晉卽以名天下不愧也同時詩人如劉松嵐法梧門李載園楊蓉裳郵簡往來不絕生平不妄干人阮太傅元陶尙書澍皆以未得一見

爲憾有豔雪堂集擬明史樂府行世子楫字梅菴詩有父風
尤工書以舉人歷榆次長子訓導罷歸縱心翰墨雖饗煢不
繼嘯詠如常有香雪庵詩鈔

張爲基字禮垣陽城諸生家貧嗜學不求仕進喜遊覽名勝
時爲詩歌以抒奇氣與張晉廷君壽陳法于結社酬唱號騷
壇四逸著有青蘿齋集法字字金門文自公曾孫也性淡雅
所居竹木蕭疏聚書選勝日事吟詠有塵外致嗜古錢收藏
甚富著有泉譜及秀野山房詩集

李毅字松溪陽城人生有奇慧讀書十行並下詩人張晉授
以所學五年而業成周石芳學使拔補諸生攜入京師詩名
譟一時而傲兀寡諧卒困於遇落魄歸家無僮石儲日以詩
酒徜徉爲樂年三十二卒延君壽爲刻其松溪詩彙行世

王豫泰字介三陽城人博學工詩從張晉遊延君壽結樊南詩社以後輩與焉性情介不求仕進著此中有我山房集宋史樂府行世

司百川字會泉高平人嘉慶乙卯舉於鄉授稷山教諭手錄鄉先生辛復元范彪西諸人遺書碎語與諸生相切劘亦能詩殊多風趣職滿引疾歸諸生留之曰呂新吾有言學校非養老憐貧地六年待罪愧此職多矣敢重吾過乎

衛浚都號淇園陽城人才清學裕工書法嗜吟詠嘉慶癸酉以拔貢舉於鄉補河曲縣訓導至卽纂修邑乘補修賢宇士民頌之擢徵縣知縣旋引疾去厯主秦州及本郡書院晚年好靜鈔書盈架著草草吟草行世

田穉字裁陶陽城人少貧嗜學十歲知辨問經旨爲周石芳

學使所獎與曲沃張子特並有奇才之目由道光乙未進士
歷長武知縣以廉明稱有伴柳亭詩集行世

唐瀛士高平人由舉人官河津教諭擢知蒲圻縣廉介不苟
工詩著有寸知齋文鈔詩集若干卷

田如錫字慕直陽城諸生性友愛家產爲昆季所耗淡泊甘
貧無怨色詩宗韋孟與從兄銘迭相酬唱一時稱其風雅銘
亦諸生詩名相頡頏

劉作霖字雨蒼陽城人性剛方博學嗜古爲文奇峭由舉人
官吉州學正諸生某負回民金逼鬻其妻爲言於官痛懲回
民出已貲以償歲歉有司徵穀遺倉飢民阻撓乃羅織諸生
五人以洩其忿幾成大獄作霖力辨從末減士民德之著有
層談自怡悅詩集子瑄華並舉於鄉

劉士彥字文溪高平人歲貢性嚴重博覽羣籍尤深於詩教
成弟子甚衆著有雨化軒草紫霞詩集

晏仲選字萬青陵川人居鄉多行義工詩善書以歲貢終有
擬明史樂府二卷同時王臨池字墨溪亦嫻吟詠著有墨花

香書屋詩草

以上澤州府

徐化溥字雲門陽高人少孤志學甚篤鍵戶下帷經史古籍
每不縱覽悉究閎奧古文詞詩歌風骨尤高一時名宿如曹
秋嶽魏瓌極皆重之撰雲中志十四卷詳密簡括可佐國史
年踰耄日坐小窗前手一編吟詠不輟間策蹇驅過知舊或
徑詣佳山水數日乃返有雲門集若干卷馮學博訥生爲刊
行於世其甥滑國賢字賓王詩文博雅能傳其學山貢官訓
導

張子德大同人居家以孝友著登順治辛丑進士選威遠衛教授達於易理並工詩朝夕講貫以闡明經術提唱風雅爲已任累遷國子監助教兵部主事告歸卒

劉琦正渾源人究心經學尤精於易著有周易附義增補五圖於考亭未盡之旨多所發明孫文靖公士毅盛稱之又輯韻學入門一書以便初學

常安世渾源人乾隆丙午舉於鄉選右玉教諭歷蒲州府教授以老乞歸性敦篤嗜學研究義理治經有法一時學者翕然宗之栗恭勳公嘗從之問業著有學庸一貫論四書本義直解漢唐宋明四朝史略

鄭陟字學山大同人性嚴峻守正不阿工詩賦兼精天文手著星宿圖要並占候之術嘉慶中以年例

欽賜舉人加國子監助教銜司訓興縣卒

楊霖字雨林大同人選貢性嚴恪矩步方行不輕言笑博通經史爲文有法度道光中創輯縣志嘗與編纂云

丁助字勉齋靈邱人性嗜學博覽強記並精書畫累舉不得志嘉慶中以恩貢選黎城教諭年踰八十卒著有東籬文集及丁氏家傳諸書

孫善守字擴齋渾源人少警敏有志操事親以孝聞讀書務求實是不爲口耳之學以諸生循序貢太學注選教諭未仕而卒著有諸經解疑讀左偶評讀史偶存古近體詩若干卷

以上大同府

蘇之芬字鐸菴朔州人事親色養兼至推產讓弟友愛終身舉康熙丁卯鄉試官曲沃教諭遷陽高衛教授所至以端品

行明經學為教雍正三年衛改為縣之芬為創輯志乘縣令房稱其有史才即授梓云湖平

連起鳳榆社人丙戌進士授瑞昌令勸農興學有折獄才性倜儻好讀異書公餘不廢著作有漫齋吟行世

王鳳翔榆社人以拔貢官黃陂知縣歸里以著述自娛嘗創輯榆志稱為典核

張維築遼州人雍正癸卯舉於鄉抱道讀書不出戶庭者十餘年精於易理著有易象管窺及常餘集

張廷奏榆社人為文博雅秀嚴有六朝風度以銅鞮賦得名乾隆丙辰試博學鴻詞當事者疏薦至都迺母憂不與試尋卒

張廷緯字如哉榆社人家貧嗜讀閉戶著書黎城靳榮藩撰

吳詩集覽多採其說以甲子舉人官應州學正所著書皆遺失惟張兩如見聞隨筆存其詩數十篇

邢鴻遼州人工詩古文善書舉乾隆庚寅鄉試有嶺坡文集武軍山樵詩鈔同時舉人王爾揚者亦有文譽嘗爲友人撰墓志中用皇考字巡撫某指爲大逆執爾揚籍其家並友人子下之獄奏上

高宗以爲迂儒泥古特諭釋之後官靈石教諭

常景星遼州人嘉慶甲子舉於鄉工詩詞古文溫華選貢號箕山樵人善書工詩其後有張錦心字樸齋舉人亦耽風雅詩才敏捷有宿學之稱

張懷鉅字兩如榆社人性揮霍自豪家盡落好讀書尤肆力於詩晚號三鄉老人著有驅愁草及見聞隨筆以太學生終

田維甸字希禹榆社人舉於鄉未仕卒資性穎悟書過目成誦喜吟詠有藤香書屋詩草

以上遼州

程康莊字崑崙武鄉人工文陳大士羅文止楊子常胥稱之前明乙亥以選拔貢太學順治中授鎮江府通判攝大營理事官治訟不少偏民甚賴之公餘與諸生賦詩論文無虛日遷安慶府同知終於耀州知州箸有自課堂集嘗在都與王阮亭朱荔裳諸人以詩唱和交相引重其後陳其年選四家文惟康莊與焉

趙三麒字乾符武鄉人順治戊子拔貢授桂陽州同知補泰州擢知同州再補橫州知州致仕歸幼穎異讀書過目不忘博綜典籍文名藉甚起佐貳游蒞民社所至以循卓著有彈琴栽花遺風案牘暇輒潛心書史既歸講文者屢滿戶外嘗

偕張文舉魏惠菴諸人會飲三樂堂年胥八十餘歲時人羨之號爲漳濱八老箬似圍集楚游草牧同紀略醫脈繫辭諸書

李之任武鄉人順治戊子舉於鄉工詩箬東山遊草及燕遊豫遊金屋匡城諸草趙偉品由舉人官教諭終隰州學正家世能文有小歌吟藁

楊尤奇字詣殊沁州人幼孤貧嗜讀有奇童之目年二十舉於鄉入都客吳文端公所得徧交當代名賢學益進庚辰成進士選庶吉士散館第一授編修充國史館纂修侍直南書房充己丑會試同考官未幾卒年三十九爲人內行純摯雅尙氣節通籍後布衣蔬食不改儒素學問精邃好爲深湛之思有詩古文若干卷

史珥武鄉人康熙丙辰進士入翰林崑山徐尙書乾學奇其
才待以國士未及散館而卒著有晉城草潞遊詩草

魏珮字德卿武鄉諸生少孤苦力學自六經史漢以及律歷
方輿卜算之書靡不研究與陳封翁彰吉寶太學寶鳳史文
學昭族人魏驃爲東巖五老會詩酒爲娛年七十四卒著述
甚富有三晉詩鈔舉狼人文志四奇錄十子金丹魏定遠中
丞年譜驃字龍寶中丞從子也有學行著東山詩鈔

楊四奇字人岳雍正甲辰進士官富川知縣性醇謹力學不
倦插架書五千餘卷悉能記誦爲文下筆立就歌賦詩詞人
多傳寫之

安子訥字金銘武鄉人雍正壬子領解乾隆戊辰成進士授
博興知縣踰年罷歸好讀書所藏典籍無不加丹黃者工詩

古文有集

秦駿字榮文沁州人由貢官大同教諭乾隆丙辰與黎城高獻同受知於藩使溫舉博學鴻辭管有四書尙書講義並詩文集

魏倫字明川武鄉人雍正壬子以選貢魁於鄉乾隆中登明通榜授猗氏教諭達於史學爲文雄邁議論縱橫皆中實用以經濟自負卒無所遇著述甚富身後文多散佚存者有莊子詁及左氏詳是編

李端字凝度武鄉人乾隆己亥舉於鄉乙卯會試被黜

高宗命搜遺卷入選引

見特授內閣中書異數也尋登嘉慶己未進士入翰林授編修以病歸卒於家性伉爽工詩在都與趙肖岩黃杏江諸人

相酬唱聲譽藉甚年未五十遽卒遺集無傳

王洪字俊臣沁州人天姿穎異癖好異書六經子史外星象方輿兵法算學卜相之術靡所不窺諸所經目或偶舉一事諮之輒曰此出某部某卷無誤者時服其博洽累舉不得志以歲貢終有集藏於家

王省山字松坪沁州人少受知於黃左田周石芳兩學使召試五臺蒙文綺之

賜旋出拔貢補太原訓導擢元謀令再補崑山歷署無錫江陰賑災弭盜並有政聲咸豐癸丑調江甯時金陵已陷於賊守令皆寄治鄉堡省山徧歷四十八社召父老激以忠義結鄉團與大軍犄角明年以疾解任尋卒性好學於書無所不讀尤深於詩著有菜根軒詩鈔十五卷從子嵩爲刻而傳之

嵩字秋嶽以軍功擢崑山知縣未仕卒

趙昌業字敬齋武鄉諸生博學工詩著有潛居瑛記循序貢
大學以終程林宗字泰卿選貢有介山文編驚鄰詩草嘉慶
中滇南王樂山崧宰武鄉提唱風雅兩人以名宿從之遊其
後以詩名者有王夢聘字莘三乙酉拔貢著所吟偶存魏守
經字亦樞士辰舉人著詠史百篇

范士熊字桓一武鄉諸生少孤貧憤志力學敦勵行義再舉
不遇遂絕意仕進一肆力於詩嘗輯南亭詩鈔於鄉先達零
篇佚句搜羅殆徧志行高潔晚益習靜咸豐同治中兩舉孝
廉方正皆固辭其後守令親爲勸駕乃勉應卒以老不與禮
部試所著詩曰瘦寒吟

沁州

白允彩字居實平定諸生幼讀書過目成誦性醇謹歛束繩

山陰縣志卷之二十一
三十一
巖然觸意氣輒奮前不少挫晚年居測魚村教授生徒與布
衣野老日遊醉鄉時爲詩以自娛簡質疏古獨杼性情有事
外遠致戴楓仲刻其詩與傅徵君父子及汾陽胡季子爲晉
四人集

苗蕃字九符平定人前明甲子舉於鄉性耽山水博雅閑達
工詩文及書法宰南城愛匡廬之勝築室東林寺遂隱焉著
有江簾吟天香吟諸集

王珣字韞輝一字石和孟縣人生而穎異成童時讀程朱書
卽慨然有志正學康熙丙戌進士入翰林授檢討親老乞養
歸主講晉陽書院十餘年以甲乙科著錄者至百餘人爲文
自出性靈長於論辨至於持身則規言矩行禮讓爲先所著
韞輝文稿石和古文大河以北未之有也卒後祀三立閣

甄鎬字芮侯平定人少警敏研精力學康熙丁丑進士入翰林進銜臣錄出爲建甯府同知時臺灣隸版籍甫踰十年鎬嘗以事奉檄至其地因著東瀛紀略二卷有裨考證尋調廈門卒於官

張恩字萬春平定人康熙庚子舉人官西湟知縣家富藏書博覽無遺歸居別業耽於吟詠四方名流乘輶過州者多造訪焉投贈之什盈篋所著有松竹軒集

張肯堂字明庭少孤嫻苦於學博涉經史爲文自漢魏迄唐宋悉究其源委入粟爲國子主充圖書集成臚錄見聞益廣而文亦益奇舉庚子順天鄉試授安化令累遷武昌府知府所至有聲

武郎錫字伯南孟縣人無錫令承謨孫也幼奇慧年十三補

諸生工詩得之天授承謨卒官貧甚凡有所感一寄於詩讀
者愛其才而悲其遇年二十二卒無子所著鹿泉集馬上吟
多散佚

董筆字叔良平定人性嗜古工詩文以選拔貢太學韓文懿
公蒞時爲司業器之因從受業歷官蒲城縣丞多異政告歸
夢人贈花五枝因署其堂曰夢花卽以名集其後子鍾成鍾
萃鍾豫鍾晉鍾謙並以科名顯果應所夢

史永直字司正孟縣人領雍正丙午解首其學博窮經史於
六藝百家莫不研及而皆折衷於宋儒謁選授安化令改安
邑教諭維風勸業學者翕然宗之著有讀書管見十三經紀
略二十二史雜錄考古雜錄及文集

祁韻士字鶴臯壽陽人乾隆戊戌進士山翰林編修進中允

改官戶部歷員外郎中嘉慶中以銅案事牽連下獄遣戍伊犁尋赦歸卒性博覽喜治史於州郡山川形勝古人爵里姓氏靡不究心在史館奉

旨創立蒙古王公表傳及抵戍所值松文清公爲將軍待以殊禮文清纂輯西陲總統事略延令屬稿因撮其要成西陲要略西域釋地二書凡歷代地志當世掌故窮源溯流蒼萃貫串鉅學鉅業實經世可施用備新編志乘乘輶乘節者羣奉爲指南在文清幕最久一時大臣服其才識斷大事必咨之又撰藩部要略專志內外蒙古回部西藏皆見推於世其他詩文集外有萬里行程記己庚編書史輯要訪山隨筆訪山者以家近方山取以自號寓終老志也那文毅公督陝甘延主臬蘭書院及文毅靖變幾輔參其幕假歸遂不復出

鈕炳綬字佩甫壽陽人乾隆己亥舉於鄉官大甯訓導嗜學工詩家有小園盡以蒔菊花時客常滿座其風趣若此而內行肅摯品望同欽卒祀忠孝祠有詩文集

劉元二壽陽人舉乾隆庚子鄉試著有帝王世系都邑便覽臥遊編行世子醫嘉慶丙子領解飛字雪崖雅慕傅徵君之爲人得其隻字皆摹勒上石補刻霜紅龕詩又輯其軼事爲仙儒外紀隱居教授以終

白以采平定人乾隆乙卯舉人官浮山教諭爲文原本經術教人以盡倫理爲要著百忍處世十難戒訟諸說以助士子生平無書不讀撰述甚多今存史鑑略讀史餘論若干卷黃璟平定人嘉慶丁卯舉於鄉官安西知州爲治務先教化明倫助學邊地曠悍之習爲之一變著有周禮集解蘭山堂

詩集祁文端公嘗以儒林循吏稱之

許長庚字蓮西嘉慶丙子舉於鄉授霍州訓導職滿擢知縣
歷署洛陽閩鄉所至並有政績生平博涉典籍怡情詩酒爲
文下筆立就尤長於駢體有初唐風格性脫洒不立崖岸故
後進皆樂就之出其門者多有聲藝苑著述甚夥其小丁卯
橋詩文集已刻行世

李緒宗平定諸生嗜學至老不倦著个亭文鈔老橋齋詩集
寶嶠字景蘇篤學勵行以歲貢終有師竹齋集

解尚字河源壽陽人道光辛巳舉於鄉博極羣書性耿介不
可干以私歷主涂水受川書院因才教導多所造就後官遼
州學正告歸卒於家所著有五經補註史論摘要等書

張穆初名瀛運字石州平定人道光中以優行貢太學充教

習生具異稟於書無所不讀才名藉甚應京兆試誤犯場規
負氣不少屈遂被斥自此謝絕舉業一意著述祁文端公典
學江蘇延入幕阮太傅時家居見所著嘆曰二百年無此作
也稱爲碩儒一時名士若俞理初何子貞王策友陳頌南何
秋濤皆與訂交推爲祭酒年四十五卒於京邸所著有蒙古
遊牧記延昌地形志願閣合譜烏齋詩文集書法勁逸冠絕
一時得者寶貴之嘗以願亭林入都會寓慈仁寺因借何子
貞醪金建祠寺中及卒同人爲位陪祀焉又祀晉陽書院之
三立閣及州之崇賢堂

閻汝弼字夢岩壽陽人咸豐丙辰進士授戶部主事遷員外
卒性清介力學好古公餘輒以著述自怡有周易爻徵廣義
行世詩經緒餘及歷代名臣詩藏於家

以上平定州

崔燦字雲峯忻州人乾隆丁巳進士授淇縣知縣調虞城所
至有聲擢大理寺評事累遷禮部郎中乞養歸燦博綜羣書
撰述甚富既歸後進多從問業稱爲乙軒先生著有稽古堂
四書講義古文別錄諸書子映辰庚辰進士亦以文名

劉嗣漢字牧溪定襄人乾隆辛未進士授岢嵐知縣改汾州
府教授幼敦孝行嗜學工文年踰九十卒有牧溪文集

樊先瀛字踞鼈定襄人乾隆庚子舉於鄉歷宰青神南充名
山平武射洪諸縣性好學自幼至老未嘗一日釋卷宦蜀久
以時事爲憂造次不能忘每聞一事可便民一才可濟時必
言之當路及同官殷勤鄭重不能自己忽忽得疾遂卒著有
保泰論十七篇卒後教匪變作蔓延三省論者以爲先識云
馬潛蛟字孔昭忻州人由舉人官太原教諭乾隆甲辰成進

士改工部主事告歸嘉慶癸酉重宴鹿鳴年八十二卒博學
工書著有容光餘草

李錫書字洪九靜樂人父珥以舉人令江西新城有政聲錫
書少穎異好讀書工文辭乾隆庚戌成進士出朱文正公門
下時聆緒論自是一意經術務爲樸學選授汶川令厯署蒲
江大邑遂州三充蜀閬同考官以同知升用假居成都卒其
爲政頗緣儒術飾吏治所在興學校勸農桑宰汶川前後幾
二十年民習其教訟簡風清公餘多暇惟日與諸生講授著
述爲樂有四書臆說周史集成錦官雜錄河洛周官圖說釋
地釋星圖海圖考等書

樊裕發字颺風定襄人乾隆甲寅舉於鄉官壽甯知縣有異
政歲饑發粟煮粥全活甚衆罷歸授徒鄉里著述多木宋儒

有敬式堂集梅林搗草

郝師伊字慕川忻州人少負才略博學工文章思以經濟見於世乾隆季年齡楚苗事起爲書數千言論剿撫機宜欲上之經略未果卒無所遇以歲貢終同里楊文炳字虎臣事親孝跬步必以備者以文行爲諸生祭酒從之遊者甚衆最著者百皓字仞山杜長生字立齋皆假筵於一第皓文不傳長生有詩文遺集一卷

孔傳性字舟山忻州人嘉慶辛酉進士授內閣中書以親老不仕歸少受學於同里崔燦先經後史於天文樂律水道皆能賅其精要館邢縣四十餘年門下著錄者數百人推爲大師云晉有倚雲堂集

韓文宇雲溪定襄人舉嘉慶庚午鄉試品行端嚴議論宏辨

學有根柢每名流譙集文至皆斂容著有雲溪雜錄同時李
鏞經字子畚以進士官至吉安府知府亦以文名嘗校刻元
道山集

銀錫齡字夢徵忻州諸生天資敏異書過目成誦終身不忘
工詩著有椿園集又輯左聯二十卷

張世祿字禮臣定襄人道光辛巳舉於鄉著有牧橋詩集其
菊花詩二十首甚爲周石芳學使所賞稱爲張菊花

梁述孔字彭孫定襄人道光丙申進士以養母終身不仕與
兄契孔從徐太僕繼畚遊最久文章雅健有法著有屢言及
芥洲文集契孔字泗心以舉人官渾源學正亦有文行

王亮功字鳳泉定襄人道光甲午舉於鄉司訓代州遷甯武
教授性冲簡嗜古鐵藏甚富聞異書必竭力購之鉛槧未嘗

釋手暇則鼓琴投壺爲娛以公事與太守某力爭揭諸大府
既得直遂告歸代人延之主講因僑居焉年八十七卒所著
有易說通鑑紀事年表等書

王錫綸字印川忻州人以拔貢選臨汾訓導同治壬戌舉於

鄉少負雋才文譽藉甚尤長於詩有集行世

以上忻州

馮如京字秋水前明山恩貢生歷官永平府同知

國朝擢知府尋遷陝西按察副使兵備榆林剿平巨盜黃色
倭遷參政駐西甯適河西回叛劫甘州疆臣皆被害如京鼓
勵士卒且戰且守三閱月賊不得逞事平進秩一階轉浙江
金衢嚴分守參政遷江南右布政使乙未冬

詔求直言疏崇理學謹兵權實京倉慎邊守四事廷論避之
調廣東左布政使乙亥入覲奏請別荒稅以足徵輸禁雜派

以供惟正嚴委署以肅官方移重鎮以清海氛指陳粵事甚
悉疏入下部次第舉行以母老乞致仕母沒服闋未及補官
卒性好學工詩在官不廢吟詠宏獎風流至老不倦所著有
秋水集粵槎日記北征記略春秋大成聖賢正誥道學鈔史
疑宮詞歷代詩錄古今雁字詩選子雲驥雲驥

馮雲驥字訥生順治乙未進士授大同府教授轉國子監博
士遷戶部主事刑部員外郎典福建戊午鄉試任四川提學
僉事以福建督糧道致仕歸幼承家學聲譽藉甚蔚州魏敏
果公象樞尤亟稱之目爲畏友己未

詔舉博學鴻詞以雲驥與睢州湯文正公斌高平畢布政振
姬並薦當世榮之性和易與人接從無疾言遽色而居官侃
侃守止不阿所至著循聲後進皆師事之蜀人祀之文翁祠

閩人祀之朱子祠皆一時曠舉也著有春秋說約約齋文集
飛霞樓詩雲中集國雍草沱園偶輯瞻花稿涉霞吟青苔篇
行世子璧乙卯舉人

馮雲驥字懿生康熙丙辰進士選翰林庶吉士授編修歷禮
科給事中嘗典試江南榜發多知名士當世高其鑒以翰林
乞假歸養家居七年與兄雲驥奉母日侍側恂恂如孺子雅
好施給里中待以舉火者嘗數十百人汲引後學得其指授
者如劉進士懔張孝廉嶼劉明經宅揆後皆以文雄一時著
有翠滴樓詩集子壘欽壘鑒並知名

問襄宇申之五壘人少有雋才隨父宦遊南北見聞博洽文
益閎肆康熙壬子舉於鄉明年

聖祖巡幸五壘山親御繁弱殛猛虎於長城嶺下錫山名曰射

虎川襄爲碑文恭紀其事文章瞻博一時推爲大手筆書法尤工其造墨人皆寶貴之字佑禧亦以文學知名

馮壘字敬南幼穎慧讀書一過輒不忘年十七魁康熙丁卯鄉試明年成進士授中書舍人出佐梧州遷南甯所至有政績粵撫彭鵬特疏薦之會遭父憂旣免喪卒於京邸壘精研經史旁及百氏之書與鄞縣萬斯同曲阜孔尚任靈縣李琮大興王源相與論學期徵諸實用年未四十遽卒時論惜之
子光裕見鄉賢

張瑜字懷公代州人副貢生平規行矩步有澹臺氏之風爲文超拔絕俗教授生徒嚴明有法選孝義教諭未到官卒著有靈崖文集可居詩草

賈克明崞縣人康熙己卯魁於鄉好學工詩著有西巖集

施揚林初名揚彬字幼野代州人與兄幼秉並負才名揚林
年未冠以大同籍魁康熙丙子鄉試爲大同人所許除名再
舉雍正甲辰科旋成進士生具異稟讀書日記千言工詩賦
著論文三則行世幼秉字入贊辛卯舉人詩文豪邁不羈隱
居教授以終

馮夢槐字兆公崞縣人明敏嗜學博覽典籍兼工書畫以選
拔遊京師名動公卿會

詔舉博學鴻詞有欲以其名應者辭弗見遂止豪宕自喜不
屑小節詩文具風致有行鞍詩草清遠齋集

張輅字子載崞縣人領乾隆辛酉鄉薦隱居不仕日以經史
爲娛著有燕山詩集明遠堂文稿

李子郁繁峙人乾隆丁丑進士幼學嗜古與兄子英弟子祁

日鍵戶卻掃著書爲樂通籍授知縣以不習吏事請改學官
補甯武教授卒後詩文多散佚有志稿四卷道光中縣令吳
纂志多本所著

馮欽字過亭初名歷後改馮性嗜學於書無所不讀博綜淹
貫詩文自成一家尤工書法性耿介不屑於世浮沈由舉人
選內閣中書遷刑部主事解職歸里闢園於所居之東著書
爲娛有春秋比事喪禮溫故廿一史表志列傳表若干卷半
學菴集三卷子祖悅見鄉賢

馮郵字合三代州人光裕子也事繼母以孝聞與弟友愛父
以廉吏守雷州卒郵歸喪萬里道窘艱苦備至不以累諸弟
也好學終年謀食奔走未嘗廢讀甚有文譽以選拔貢生舉
甲午順天鄉試卒於京師弟郊邵並工詩郊字定九州文學

有果度道人詩邵字西輔太學生有瑤嬰山房集

郎錦駒字英千代州人少儻讀書不屑爲章句以諸生充
四庫全書館纂錄膳錄議敘得州同分發安徽未補官卒有
抹雲山房初集萬里吟南遊餘事希閒草堂集若干卷弟錦
駿錦駿

郎錦駿字健菴從秦學士大士遊與弟錦駿並有國士之目
乾隆丁酉同舉順天鄉試大興朱學士筠錢塘陳太僕兆崙
皆嗟賞之輩下貴人遇有進奉文字輒薦令其兄弟撰擬聲
譽藉甚性恂謹與弟友愛特至弟卒時鬱鬱不自得未幾兄
亦客死感悼成疾遂不起著有瑞芝軒文集復堂詩存代東
隨筆跋茗餘吟錦驥字德安著有力園文稿安素行吟聚雲
南浦詩存

張震字東墅崞縣人祖銓諸生工詩善書有高行弱冠喪妻不再娶父沛仁字元里乾隆乙卯舉人窮經以老震承家學博極羣書年十八舉於鄉爲學凡經史子集以及金石皆手自讎校詩古文亦雅潔有法司訓孝義職未滿告歸性介直寡交遊晚好黃老家言著述不自收拾皆散佚惟東墅詩錄有鈔本行世

亢勳字荔園崞縣人博學工詩兼善書法爲黃左田周石芳兩學使所賞以優貢應嘉慶辛未五臺

召試選充文穎館膳錄授平陽府訓導道光辛巳舉於鄉著有望山堂詩賦校訂論語鄉黨篇考孟子班爵祿考行世田耕字辛巖崞縣人援例入太舉搜羅古籍甚富構樓三楹顏曰卓觀盡以藏書朝夕披覽不倦尤精書法篆隸八分人

爭寶之有箋註瀛海探驪詩行世

張曾字小袁崑縣人父守仁以選貢官孝義訓導究心理學
著見聞因知一得等錄曾性聰慧工詩古文尤長於駢體書
法亦有奇氣舉道光丁酉鄉試遊幕十餘年所至爭迎禮爲
上賓軍興從戎開隴間以功游擢至布政使卒著有歸綏識
略古近體詩若干卷

以上代州

黃宅中河曲人壬午進士選庶吉士改官安溪知縣調侯官
歷承順府同知大定府知府旋投浙江杭嘉湖道未任以疾
歸家居督辦團練加鹽運使銜尋卒生平砥礪名行能自刻
苦盡心民瘼所在以廉惠稱好讀書聽政之暇輒手一編守
寶慶大定皆修其志所自著有思果齋自省錄敬述編四戒
述言法家庸言讀書劄記鞠散廬存稿黔遊紀行日錄思果

齊雜著詩草藏於家

保德州

馬淑援字亦波解州人前明己卯舉於鄉順治中授邵武府推官與丙午閩闈分校舉卓異缺裁歸遂不復仕淹貫載籍纂州志爲一時文獻子允尙由舉人官龍游令亦以博學名楊愈節字杜瀾解州人少嗜學畜書最富寒暑不輟力追博雅逆闖之變考掠富室舊家號曰比餉愈節以父母官縣令亦在比中急辦百金往蒲輸限道逢鬻廿一史者內府物也竟以輸金市得徒手就比賊帥訊得故憐而釋之人號爲書淫以歲貢終著有閒吟集

介元佑字右人解州崧貢高潔端亮淹博能文著有歷朝統系藏於家

杜濱字砥峯平陸人康熙丙戌進士授中書改宣城令有能

聲行取宗人府主事轉御史遷給事中數上封事悉關體要
出爲陝西糧儲道卒性端嚴聰敏博覽羣書著有澹廬詩文
集同民堂政績八風鏡漢人百詠

介錫周字鼎卜解州人康熙辛丑進士累官太僕寺少卿歸
里杜門謝客自稱老書生如未嘗居官者然淹貫經史州守
言如泗纂修州志徵考文獻錫周與有力焉子玉潮傳其學
由進士官吏部郎中

丁廷樾安邑人康熙癸丑進士授編修歷官徽州府知府廉
潔有聲能詩著有紀遊草

王釐方安邑人性穎悟讀書過目不忘足跡幾遍天下所至
題詠才思兀傲不羈趙秋谷太史許爲晚唐妙手坎坷不第
由貢生官戶部司務

王餘佑安邑人歲貢博洽羣書工詩尤精行草與修運司志
自著有四書纂要素齋詩稿

葛鳳翔安邑人性孝友甘貧嗜學耿介廉方工詩文書法贈
禮部員外郎

宋鑒字元衡安邑人生而穎悟善讀書乾隆甲子舉於鄉戊
辰成進士授常山知縣三年調鄞縣莅鄞七年以廉能升南
雄府通判歷署連州潮陽澳門同知所至有政聲士民立生
祠頌遺愛馮以親老告歸囊無長物攜書數千卷而已其後
弟鉅爲確山令招之至署未幾卒鑒湛深經術以古文尙書
疏證文詞曼衍而不爾雅重輯尙書考辨四卷嘗曰經學不
明小學不講也形聲莫辨而訓詁無據矣說文解字乃小學
之祖也探經史方言釋名玉篇廣韻水經注諸書爲說文解

玃詳贖辨博又益以增借備三門爲朱氏一家之學又有
易見尙書彙鈔漢書地理考詩文集藏於家子葆醇

宋葆醇字芝山年甫冠舉癸卯順天鄉試具異才磊落不羈
博極羣書工詩善畫山水尤臻絕境名譟京師求畫者得片
紙愛護如至寶素嗜古博識篆籀辨晰歷代彝器與錢玷吳
東發諸人並稱精審一時名公巨卿爭相結納生平淡於仕
進官臨州學正未踰年卽告歸好名山遊儒者共慕其高雅
柴從規字象天平陸人少嫻騎射入武學好覽古今書於經
史象數皆能喻其旨嘗注孟子干文解尤工書得者寶之
謝松齡安邑諸生穎異超羣博極羣書善文章工吟詠著述
最富從弟柏齡歲貢亦善屬文

毛爾音字子虞夏縣人父首選太學生有文行爾音博極羣

書詩文有法度嘉慶戊辰魁於鄉授知縣未仕著有經典類
釋長嘯堂詩集

毛應觀字盥三夏縣人嘉慶甲子舉於鄉授安縣知縣學問
淵博名重一時著經圖彙考從弟應豐字玉田丁卯舉人歷
遼州保德州學正品行端正經術淵深著易微大成錄杜詩
集鈔

王榮安邑人博學工文書法尤精以選貢寓京師書名動一
時官獨山知州廉介自持嘗謂剝民脂膏鬼神不佑解組歸
寒素如故

馬百度字振齋解州人舉道光乙酉鄉試事親以孝聞主講
龍門西河及解梁書院從學甚眾著有味芸軒詩集

李芝田芮城諸生世父指南守貧慶以爲嗣後世父生有子

而卒乃盡推資產以與其孤居鄉扶困濟貧多行義嗜學工詩有食品咸勻集尖义集

荆戴行字友篤平陸人以文行為鄉里推重著有半酣詩集二卷諸生毛文煒字彤廷亦工詩有澗溪草

張琳字玉林夏縣人弱冠擅文名鄉里從學者多以科名顯而獨困場屋同治甲子主司刊其文已摧解矣卒以他故擯性好學至老不倦尤精於醫遠近悉知名以副貢終

周晉字康侯夏縣人由舉人官翼城教諭好讀書工詩文中年後研究經學著詩古韻釋例聘修通志甫踰年卒

以上解州

李復泌字則叶絳州人康熙壬戌進士由檢討轉行人司行人精研經史宏雅淵深一時咸推宗匠歸里後裒輯儒先著述名曰九經考歲戊子平陽郡守劉延修府志稱其學有本

原云

郝增漢字公甫絳州人家貧力作養親性嗜學隴耕之暇吟詠不絕晚年師完冰壑純靜專一言笑不苟尤精數學推算天文析及毫杪著有廣小兒譜

安清翹字翼聖垣曲人與兄清翰並負才名登乾隆庚戌進士授三水知縣以廉惠稱於學無所不通尤深於算著有算學五書行世清翰由丙戌進士宰潛山有政聲工古文辭文爲憲垣曲諸生性孝友持已接物胥軌於正犯者不校鄉黨賢之生平於書無不所不窺晚益勤讀字畫音義校讐必審皆有自娛詩集

劉績唐字陶莊聞喜人天資穎異讀書十行並下爲文頃刻千言古茂淵懿驚其長老尤長駢體識者以爲視吳穀人劉

美初不惟無愧以選拔貢太學卒

何星文字經臣稷山諸生才情靈敏博涉經史肆力風雅詩頗爲人傳誦而恆自謂不愜心以巴人下里名其集

郝臺魁字夢山絳州人名與字悉孕時夢兆也性方謹學問淹博嘉慶辛未以諸生與五臺

召試

欽賜舉人恩沁水太原訓導與郝文端公爲道義交嘗襄理南書房筆墨並繕

御製詩餘集數蒙

恩賚晚年主講宏通書院著有安遇堂詩文集

王震龍字霖九稷山人中書舍人之屏子也好學工書著有綠筠軒詩集

段淵熙稷山諸生天性孝友枕藉經史力窮奧窔尤精於易

著有周易集解

以上
絳州

王文彪字虎變蒲縣人幼聰穎日誦數千言作文不加點竄

而出語新奇晚年工詩詞以歲貢終

隰州

梁樞字斗文靈石人素行端謹任繁峙教諭訓士有方捐俸
倡修聖廟增置禮器校刊溫公稽古錄行世著有瘦吟詩草
祕枕文編各一卷

何道生字立之一字蘭士靈石人乾隆丁未與兄道冲同登
進士授工部主事擢御史出守甯夏歷知九江府並有政聲
好學工詩在都與洪稚存王鐵夫諸人相友善唱和最盛其
詩疏爽雄健出入於昌黎劍南間有方雪齋集行世道冲後
易名元煥字硯農詩文與道生齊名由翰林改官同居部曹

又相代爲御史終於太平府知府有硯農築

張于鑄字鐵生趙城人道光乙未舉於鄉少受學於平定許
蓮西大令工詩賦楊忠節公延亮宰趙城尤奇賞之中年後
一意窮經研究六書與王顧齋同客東魯登泰山賦詩言志
傳誦一時性博覽強記長於論辨每廣坐縱談文史風發泉
湧疊出不窮莫能舉一義以相難也司訓絳縣遷蒲州府教
授以佐辦賑務保獎五品銜尋告歸歷修絳州曲沃絳縣各
志及省志開局當事者延爲副纂並襄校令德書院年七十

卒

趙履泰字季安永濟人少好讀家貧借弟仲成名藝炷香照
讀詩宗少陵工古文詞同郡崔汝掌程夢乃李海峯皆負夙
望少許可特心折履泰以爲復見先輩風格家黃河岸嘗守

一編灘頭坐讀自謂借風帆沙鳥助文心耳晚號西村老人
卽以名集子光璧字杏農嘉慶辛酉進士傳其學箸抱甕草
堂詩詞鈔補遺下同

康行個字錫霜安邑人聰慧絕人十齡工詩文才名聳動一
時由乾隆甲戌進士宰韓城內擢工部主事告歸以詩酒自
娛所著有韓城縣志運司鹽政便覽雲齋清籟

李夢河曲人世稱清河先生以詩鳴著有草堂閒話醉後狂
言詩集若干卷

右二百六十五人又七十五人附見

山西通志卷一百五十六